

**Laporan Audit Negara tidak berguna tanpa tindakan, kata Setiausaha Agung DAP  
Malaysian Insider  
Oct 6 , 2013  
OLEH DIYANA IBRAHIM**

Laporan Ketua Audit Negara mengenai pembaziran kerajaan ke atas wang rakyat tidak akan mempunyai sebarang makna sekiranya tiada tindakan diambil kata Setiausaha Agung DAP, Lim Guan Eng (gambar).

Menurut Lim yang juga Ketua Menteri Pulau Pinang itu, pendedahan tersebut jelas menunjukkan terdapat penyelewangan dan ketidak telusan dalam sistem urus tadbir kerajaan Barisan Nasional (BN).

"Ketua Setiausaha Negara Tan Sri Dr Ali Hamsa menyatakan kerajaan menubuhkan jawatankuasa khas untuk menyelidik dan mengkaji Laporan Audit Negara 2012.

"Bagaimanapun agak melucukan apabila kajian sebegini hanyalah pendedahan tanpa tindakan. Saya pasti rakyat Malaysia tidak akan menerima taktik kerajaan yang cuba melengah-lengahkan dan memutar belitkan kenyataan dan akhirnya ia seperti pendedahan yang dibuat tahun-tahun lepas dan mati begitu saja,"katanya dalam satu kenyataan hari ini.

Malah ahli parlimen Bagan itu turut menyelar sikap berdiam diri kebanyakan agensi kerajaan yang masih belum tampil menjelaskan kepada pembaziran wang tersebut.

"Kerajaan tidak harusnya berdiam diri sebaliknya mengambil tindakan mengenal pasti kelemahan seperti pengurusan yang tidak efektif, kurangnya pemantauan dalam sesuatu projek hingga menyebabkan kegagalan," katanya.

Malah kerajaan seharusnya menerima pelawaan Pakatan Rakyat (PR) yang mencadangkan satu jawatan kuasa disertai Timbalan Perdana Menteri sebagai Pengerusi, disusuli dengan Ketua Pembangkang dan Ketua Audit Negara yang bertujuan untuk menghalang penyalahgunaan dan menghukum mereka yang terlibat dalam penyelewangan.

Sebelum ini, dalam sidang media bersama pimpinan PR, Lim mencadangkan agar dibentuk penal itu untuk menyiasat segala laporan Ketua Audit Negara itu.

Lim tidak yakin Jawatankuasa Kira-kira Negara mampu menjalankan tugas penguatkuasaan ke atas segala penyelewangan itu kerana majoriti ahlinya terdiri dari penyokong BN. – 6 Oktober, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/laporan-audit-negara-tidak-berguna-tanpa-tindakan-kata-setiausaha-agung-dap>

